

四庫全書

集部

欽定四庫全書

集部
薛荔園詩集卷二

詳校官監察御史_臣周元良

侍讀_臣孫球覆勘

總校官中書_臣朱 鈐

校對官中書_臣李 荃

謄錄監生_臣李翹鳳

欽定四庫全書

薛荔園詩集卷二

明 余翔 撰

五言律詩

題戴氏風澤山房

二首

誰栽千樹橘
況近百花莊
何用愚名谷
只宜醉作鄉
行藏高卧穩
歲月著書長
興到來看
竹無勞枉報章

其二

結屋松林下終朝獨閉關猖狂知濁酒搖落對青山種
樹荷鋤去尋僧採藥還眷茲招隱地倘許數躋攀

七夕舟中

銀漢迎仙佩金飈動客舟江湖逢此夕砧杵報新秋塵
世傷萍梗清宵看女牛班姬團扇賦吟罷不勝愁

真州送林明府攜家還鄉

三首

故園何處是閩海路漫漫兒女天涯淚窮愁世路難新
詩工謝朓往事拙潘安一臥秋江上鱸魚滿釣竿

其二

楓林搖落候有客賦將歸湖海十年夢星霜兩鬢稀田
園存晚計蘿薜遂初衣回首雲霄迴天涯萬事非

其三

攜家尋舊隱豈為鹿門期客久薪如桂愁來鬢有絲風
塵悲在苒戎馬苦驅馳歸去盟猿鶴巖居更不移

河上即事

六首

淮南飄泊者秋水信輕舸萍梗還千里風塵感二毛露

滋葭蒹冷天濶雁鴻高蹈海吾何敢來觀八月濤

其二

豈學莊生傲聊為汗漫遊銜杯捐萬事得句倚扁舟大
漢秋風起層城海氣流長歌招隱賦桂樹斲淹留

其三

秋色欺霜鬢飄零胡不歸滄洲吾道在白眼世情非有
客歌叢桂何人問少微但看沙上鳥來去總忘機

其四

慘淡浮雲色蕭條萬里情風塵何落魄湖海且逃名喪
亂依劉表離騷賦屈平陸沉無不可歸去問柴荆

其五

浪跡緣何事風帆任所之滄波含暝色白露脆秋枝海
市漁燈鬧江天雁影遲徘徊良夜月賴有手中卮

其六

偃蹇嗟吾道支離笑此身何當歸採菊無日不思蓴秋
色丹楓冷西風白髮新翩翩鴻鵠氣千里去無垠

早春和方子及病中見示之作

諱沆號詠菴進士雲南提學

漢京新改歲怪爾避風塵伏枕原非病裁詩最有神江山含紫氣梅柳鬪青春憔悴還如昨誰憐澤畔人

題九鯉湖全郭士龍林翌甫作

琳宮高縹緲登眺若飛翰地僻藤蘿古潭深日月寒石牀空有蘚金竈已無丹採藥從茲去胡麻或可餐

寒食病起寄鄭文蔚陳堯勛姚翼卿

落落天涯客春風病未瘳此生扶藥餌故國夢松楸對

雨逢寒食經年擁敝裘
王孫芳草路何處不堪愁

金子魯席上留別孤山社諸君

已結陶潛社還看謝眺山
一尊樓閣別孤客海天寬
金石心難變江湖鬢已斑
武陵良月夜風雨未堪攀

贈屠緯真

何年辭建禮天地老黃冠
書著藏名岳家貧服大丹
西湖雙桂棹東海一漁竿
回首長安日浮雲夢裡看

詠謝娼蝶裙是貞吉王孫所貽

鮫鮪新出海六幅製為裙搦得滕王蝶粧成峽女雲幽
香春入夢微步水生紋解咏空中雪謝家自不羣

聞林兆倫入九鯉詩以懷之

聞爾尋真去何山第幾重仙禽翔縹緲大藥採芙蓉夢
醒寒潭水心清曉月鐘所嗟羈物役徒想白雲蹤

送康孟擔遊吳越

芳草春晴候看君賦遠征嶺雲寒傍馬堤柳暗鳴鶯酒
濕鮫人淚歌含郢客情相知勞問訊白首臥柴荆

晚泊有懷

晚泊弋陽溪孤舟望裡迷
桃花千樹亂杜宇數聲啼
積雨沉漁火迴風咽鼓鼙
美人山水調心折大江西

宛丘宿方子嗣宗館中

久客辭梁苑長途入宛丘
故人一握手千里散離愁
東燭寒砧夜開尊片月秋
翻思桃葉渡繫馬醉青樓

汪司馬招入桃源賞桂同
吳翁晉蘇君昭汪仲淹

分賦得林字

桃源殘暑退城郭澹秋陰玉露分河漢天香散桂林王
孫招隱賦公子採芳心偃蹇空山曲攀援意轉深

答王百谷

叢林寒夜別明月寄新篇君自紉蘭佩余仍拍酒船百
年貧傲世半偈老逃禪欲下高齋榻鶯花二月天

題林邦介溪上別業

一水抱村流門臨杜若洲桃花停上騎蓮葉命扁舟波
蕩千峰影風迴六月秋西園名鄴下詞賦重應劉

賦得紫陽洞

石洞俯崔嵬，龍蛇繡碧苔。
五丁何日鑿，二酉此中開。
度索花仍發，浮丘鶴不迴。
胡麻如可飯，長嘯入天台。

讀黃亨夫萬玉山房稿賦贈

曾諫長楊獵，翻為澤畔吟。
幽蘭寒作佩，流水咽鳴琴。
天地飛揚態，山林偃蹇心。
若非同調者，白雪幾知音。

晉安館中紀懷十首

片帆初度峽，一上釣龍臺。
睥睨三山出，輾轡萬井開。
披

襟下白鳥散髮步蒼苔稍喜風塵靜誰當保障才

其二

落魄餘雙鬢城隅問故人庭陰蕉葉老秋色菊花新
陋巷嗟何事浮雲笑此身床頭多綠酒莫厭客來頻

其三

秋色正搖落山山柿葉黃那堪當逆旅況復是重陽
猿斷滄江月鴉啼老樹霜不知孤館客何處泣干將

其四

節序逢青女他鄉未授衣
顏容愁裡改形影夢中歸
此日徒餐菊何山可采薇
却憐同病者迢遞暮雲飛

其五

青霜沾夜草對此暗銷魂
短榻寒秋水孤燈掩華門
途窮營桂玉淚盡隘乾坤
安得冥寥子論心酒一樽

其六

西風吹萬籟城郭起秋濤
病色依雙樹愁心感二毛
香生黃菊細寒傍白雲高
歸去衡門下憑誰讀離騷

其七

落葉紛如雨愁人獨倚樓千峰明遠水一鳥下滄洲湖
海頻相望神仙未可求欲歌招隱句乘月弄扁舟

其八

越王臺上望秋色最堪憐五虎羅青嶂雙鴻破碧天芙
蓉充雜佩蟋蟀伴孤眠欲覓知音者雷陽路幾千

其九

垂老長為客愁心夜雨多綈袍誰復戀白石自長歌薜

荔侵荒徑梧桐冷碧柯披衣待明發歸思滿煙蘿

其十

長鈇歌魚日蕭蕭兩鬢斑行雲空入夢倦鳥自知還漢
浦懷仙佩菱花對玉顏不知秋色裡幾度望三山

贈金子魯開府

二首

大楚勞分鎮全閩重策勛虎符嫺妙畧龍劍靜妖氛白
羽搖山月朱旗拂海雲轅門無別事傳檄草雄文

其二

牙帳開青甸，鸞旗下絳霄。
星屯平楚戍，月湧大江潮。
竹箭千章合，桃花萬騎驕。
治書鈴閣暇，清問到漁樵。

秋夜同陳子卿集黃堯衢宅觀菊

玉樹風初冷，蕭然白髮新。
忽投江夏宅，又得杜陵人。
綰佩懷湘女，殄英笑楚臣。
何嫌燭秉燭，斗酒夜相親。

春日康孟擔過訪薜荔園

一徑春陰裏，松蘿白日昏。
若非高士駕，誰到故侯門。
竹下詩偏秀，壚頭酒未渾。
莫言供給少，枕藉有芳蓀。

集鄭文蔚草堂同尚晉拱元作

秋色迴叢桂開尊詠楚騷青雲誰附驥白眼一持螯露
冷花陰月風生樹杪濤子真棲谷口何處弋鴻毛

登滕王閣

高閣秋逾迴寒潭影自深君王不可見過客一登臨車
騎風烟散笙歌棟宇沉捲簾看暮雨依舊洒城陰

秋日燕子磯即事

燕子枕江流隨波上下浮天分吳楚塹地控帝王州網

罟漁人集帆檣估客愁白雲尊酒盡一嘯秣陵秋

寄屠田叔

芳春已二月偃蹇一狂夫風雨花開落關山雁有無清
言懷玉屑傲吏對冰壺欲買扁舟去蓬蒿病未蘇

全鄭文蔚飲水亭作

水曲花偏麗柴門客到稀藤蘿盟不負鷗鷺浴相依半
醉眠芳艸長吟望翠微柳條春欲暮肯令賞心違

秋夜全吳湛之陳汝鑒過康孟擔草堂

汗漫渾無事杖藜向爾投幽蘭紛薄暮南斗耿清秋秉
燭窺玄草傾壺醉白頭興闌從去住霜月夜悠悠

寄龍君善

四首

忽得燕中信嗟君有謗書雲靈豐獄劍驥服太行車赤
縣飛騰久青雲拓落初桃花春水滿歸混武陵漁

其二

楚材豈易得偃蹇一長嘆遺愛歌南國高名疾上官五
都懷白璧九畹藝幽蘭且泛扁舟去洞庭波浪寬

其三

黃山與白岳幾度興流連却笑緇衣客翻憎貝錦篇
旂歸楚日難犬避秦年若遇東來雁裁詩寄綵牋

其四

文章窺屈宋仕路轉堪悲去矣驚投杼潛然泣染絲
白雲瞻故里青桂喜連枝二酉探書罷彈冠慰所知

遊萬山觀全郭次甫何長卿潘景升許去疾劉季

然分得萬字

策杖叩玄關綠崖穿野蔓疑登黃鶴樓更煮青精飯御
氣瞻朝元臨風聽吹萬眷茲汗漫遊豈負烟霞願

水亭讀鳳皇山藏稿贈黃堯衢

把酒臨流日讀君卷裡詩才華多幼婦風雅是吾師龍
種千羣失鳳毛五色披凌雲還有賦況值好文時

其二

蓬門深謝客隱几意何如偃蹇便科髮窮愁懶著書松
陰移短榻烏跡亂前除幽獨春相媚無勞嘆索居

其三

劉伶深嗜酒陸羽解烹茶高士名猶在吾生興不賒負
新吟野徑煮石待山家若問浮生事池塘暗落花

立秋日詹淑正見過小酌

寂寞掩柴荆相過見汝情伏天流大火片雨下孤城饑
饑蘇何日江湖混此生壚頭聊共醉坐聽井梧聲

殷公覲招集水西亭全何行吉詹淑正管象吉洪
仲昭楊承之作

郭外生秋色移尊集水西青山懸睥睨白馬駐招提叢
桂淮南隱芙蓉鄴下題酣歌猶未已歸路夕陽低

寄題龍華寺無東堪公

寶幢山下寺塔影掛層霞八水分功德諸天散雨花將
詩來入社得酒便為家悟得無生理超然轉法華

緱溪館中晤王永叔沈生余二明府

郵亭開錦帳尊酒話襟期已下王喬舄還吟沈約詩烽
煙生海上鴻雁隔天涯把袂休辭醉重逢定幾時

仙溪舟中報黃德符

為訪仙源去蘭橈趁晚風山青煙樹外溪碧火雲中勝
事懷河朔幽心寄桂叢美人渺何許臨水送飛鴻

周元孚邀仝鄔汝翼胡應之何長卿黃白仲沈孺
林登瓦官寺青蓮閣作

瓦官名不減高閣復青蓮問法憑支遁裁詩想謫仙黃
圖留玉氣白浪落人煙宿障除煩惱皈依不二禪

同彭玉潤遊攝山 二首

歇馬行松徑尋僧度石橋欲窺龍藏勝不憚虎溪遙踰
嶺參千佛看碑辨六朝誰言陶處士猶待遠公招

其二

一片烟蘿地空山湧白蓮欲除煩惱障先辨辟支禪鳥
下翻經石龍沉洗鉢泉新詩携謝眺翹首問青天

登穀城山

春入江山麗登高醉眼開鶴盤滄海下人躡白雲來解
帶懸修竹飛觴藉落梅漫留金石句天地妬雄才

秋日集歐楨伯青谿館分得谿字

官舍清於水開尊對木犀地當留笛步客到浣花谿
氣乘秋入斜陽度鳥低尚書期不顧肯惜醉如泥

陳翰卿招集烏山同許伯綸康孟擔楊任道作

卜築南山下開尊醉薜蘿蘭投湘女佩雪和郢人歌
海岳窓中盡樓臺樹杪多翛然發長嘯揮手亂星河

春日雨中懷陳士傳

律轉青陽候愁聽曙雨聲梅花寒自落柳色嫩初生
撲

竹驚棲鶴穿林却嚙鶯青山招隱處延眺獨含情

春日宿康孟擔齋頭賦贈

愛爾棲遲處門庭靜不譁春生書帶草香染木犀花短榻工文藻晴窓閑歲華相過偏信宿有酒不須賒

郊居即事

柴門流水曲隄几絕逢迎亂竹烟初斂孤村雨乍晴隣翁分藥草稚子進藜羹誰識幽居處無營度此生

寄費無學

仙才不可見大雅屬斯人斗酒歌相勞綈袍意獨真
文章窮屈宋鐘鼎辨周秦別爾匡廬去千山若比隣

送立雨叔之海陵

三尺芙蓉佩腰間色陸離那堪千里別況復九秋時
瓜步乘潮興蕪城弔古詩小山叢桂好莫忘倚門期

海上述懷

空門無剥啄伏枕過今朝病色懷殮菊生涯寄綿繭
月搖湘女佩風動潁人瓢寂寞玄經在冥鴻未可招

送方伯書游北雍

諱承芴號希詡
戶部尚書郎

長安多結俠君去意何如
泰谷春吹律聊城客射書如
雲瞻壁水有賦奏公車燕市
逢人問窮愁兩鬢疎

度新嶺作

二月且逢閨披裘猶自寒陰
雲霾曉日流水咽高灘馬
首風塵苦羊腸道路難青山
花漸發不似故園春

京口早發

遠寺疎鐘動長江片月流
客愁眠不得起視水邊樓河

漢星將曙關門柝未休
榜人初擊楫西上秣陵州

茶洋舟中

溪烟飛漠漠久客蕩歸舟
水落灘聲急天寒曙色浮
風塵孤劍暗戎馬十年愁
翻怪鄉園近傷心是舊遊

對月有懷

愛此清秋月盈盈水一方
青天如挂鏡白露已沾裳
波泛蟾宮冷風飄桂闕香
沉吟團扇句能不斷人腸

送吳公挺之建州

君向芝城去雲山望幾重灘聲喧黯淡秋色冷芙蓉千
里懷中劍扁舟夢裡鐘溪頭明月好載酒慢亭峰

鄱陽舟中

乘槎千里客一葉下鄱陽雁起闔天迴烟連楚水長江
魚投網罟海燕逐帆檣暮雨瀟瀟急鳴橈欲斷腸

左蠡雨泊懷彭使君

雨中停桂櫂一眺盡重湖巨浸吞吳楚長鯨伏有無臨
淵嗟結網見獵動飛弧何限懷人意風波咫尺孤

雨中柬鄭道行

二月雨聲寒蕭條擁鶚冠疎鐘沉別院獨鳥下空壇
久客嗟燃桂深山想采蘭君家書帶草何似故園看

賦得金沙水同袁履善作

一派分阿耨寒潭九里沙雲蒸靈液煖日動瀾紋斜
麗水盤初地恒河露覺花欲將龍井去支鼎試新茶

攜李雪中懷吳翁晉

積雪連平野饑鴉不可聞相如懷授簡小令欲書裙
水

與銀河接山從玉壘分
郢人歌寂寞此際重思君

李節之招飲龍潭仝周希安宋初陽蔡幼公章子

敬作

別館臨流迥高樓背閣偏
披雲星作客傲世酒稱仙
孤塔空中起千家鏡裡懸
何時乘夜雪重泛剡溪船

夏日仝柯大啟林晉伯鄭若東柯爾珍避暑覺上

人蘭若

曳杖遵南國言尋白社期
龍應沉法水鳥已集禪枝
移

席臨溪閣行厨薦露葵遠公偏許飲欲去漫攢眉

丁丑秋日書事

端拱勞清問誰當萬里城戎威驕假道漢將大徵兵抗
疏多新進運籌屬老成禁中頻拊髀頗牧昔時名

秋懷二首

迢遞千山道疎林落日低傳書悲塞雁伏枕聽莎雞雙
鬢凋風雨孤城厭鼓鼙東閩何處是人在楚雲西

其二

西風搖落候客自滯江城鴻雁三秋淚蒹葭一水情醒
逢漁父問俠藉酒人名多病銷皮骨熊經學養生

送丘明華之浙中謁胡參政

朔氣擁江門離心那可論數聲寒度雁雙淚暗啼猿訪
古嚴灘下探竒禹穴存薇垣知國士去矣漫銷魂

寄余思澄

斗酒一為別江湖嘆索居詩曾題五柳夢每折雙魚彩
筆風雲麗青山歲月虛交情深繾綣爭奈雁來疎

秋夜呈伯華

獨坐高樓夜蕭然
旅思生井桐
秋一葉城柝月三更
劍合雌雄氣詩傳
鮑謝名山中
叢桂在無日
不含情

泊金沙

西風吹暝色
野雁倚孤舟
水氣將秋冷
溪聲帶月流
交游虛顧盼
著作老窮愁
明發揚帆去
隋珠何處投

木蘭陂春泛同堯勳子韓文蔚作

春流綠於染
載酒罄交歡
沙鳥輕相狎
江花笑未殘
夜

含波影動曲度柳條寒曠達真吾事悠然咏考槃

病後伯華仁甫汝存攜酒見訪

二首

茂陵多病渴蕭瑟更悲秋忽載花間酒同為月下遊
露華清欲滴楓葉老堪愁莫惜如泥醉風塵易白頭

其二

偃蹇長為客年華伏枕過貧應甘季次病豈示維摩
玉勒停秋草金卮泛夕波徘徊情不淺取醉月中歌

寄方景武

諱元洪工近體
在臧將軍幕府

塞上悲歌者相違路幾千著書曾入趙擊筑更遊燕白
羽徵兵日黃金結客年幕中工草檄還憶舊青氊

題林敷毅立壺圖

孤鷺界蒼烟憑高思渺然飛雲迷古剎落日俯平田醉
拾金光草閒尋玉乳泉天風吹短袂縹緲若飛仙

見二毛作

生事惟高枕蕭然已二毛山中歌扣角花下醉持螯身
世窮何礙風塵夢亦勞但教無俗事隨意讀離騷

對月吟

涼風吹海月皎皎度遙岑映水金波靜穿林玉樹陰闌
山征婦淚萍梗故人心獨坐愁無賴蕭然動客吟

冬夜堯勲過訪值雷雨大作

歲寒風雨夜興似剡溪船雷震嘉平月星纏已卯年酒
人吾獨老詞客爾堪憐剪燭彈棋罷聯牀一醉眠

初夏柬姚明府

羣木散繁陰懷人思不禁九華青似黛幾度夢相尋康

樂題春草步兵笑竹林溪頭新水至遲爾一披襟

懷晉安諸子 二首

忽忽驚殘臘蕭條已二毛自應懷短缺誰復戀綈袍夜
雪深蓬徑寒松瀉海濤不知詞賦客何處醉持螯

其二

抱病衡門下孤村歲暮時貧耽元亮酒老愛建安詩雨
雪龍蛇臥稻梁烏雀悲無諸二三子幾度夢中期

咏懷呈諸同社 六首

青鬢衡門下朝來雪數莖文章嘲薄俗貧病寄浮生
櫟元無用藤蘿合有盟中原二三子鞭弭氣縱橫

其二

吾道窮何甚年豐亦苦饑江湖交漸薄蒲柳病相依
鹿破隍中夢鷗忘海上機此生沉濁酒荷鍾未全非

其三

夙昔飛揚態年華去不留七星空佩劍五月尚披裘
翰墨非長技稻粱那自謀江潭天地意枯槁未應愁

其四

草玄甘寂寞誰識子雲心十口窮相傍二毛病不禁風
塵空落魄山水幾知音萬古江河色滔滔宜陸沉

其五

伏枕朝慵起蓬蒿一徑存妻孥親井臼衰葛失寒溫藥
自頻增減詩多廢討論幸無車馬跡終日閉柴門

其六

咄咄書空日明時一病夫歲華徂薜荔生事老江湖興

劇還看竹心冥似據梧向來羈五斗空自辱泥塗

全趙獻武林紫甫飲仲仁宅

誰道元龍傲相逢意轉親但教千日醉莫笑百年貧風
雨能留客烟花不負人夜來占太史星已聚荀陳

戊子夏日祝士會招集信州北樓全祝士南汪季
美次唐人李郢韻

登樓愁作賦把酒喜看山雙鳥窺人下孤雲度隴還
荒何日定貧病此生閒醉裡行吟客悠悠戀故關

雨後懷陳克勳

空齋聽雨夜芳樹轉秋聲擁褐饒寒色談詩憶友生扁
舟湖海興斗酒薜蘿情那得狂相傍長歌對月明

雨中寫悶

漠漠黃梅雨芝城五月秋濕薪吹不起平礎漲堪愁歲
儉驚千里家貧夢一丘誰能鞭日馭長笑弄扁舟

旅病

焚香聊晏坐旅食計蕭然不分薪如桂更嗟屋似船愁

來脂髓盡老至雪霜偏身世已如此無勞問九天

病後柬陳季迪

白髮長為客孤燈暗抱疴據牀親藥裹伏枕想漁叢生
計浮雲薄鄉心積雨多明朝逢競渡無奈獨醒何

午日謝性卿招集齋中薄暮登樓賦此

競渡逢佳節多君折簡招艾符方在戶蒲酒且盈瓢對
榻揮玄麈登樓拂斗杓左徒遺恨在千載未能消

坐雨柬吳師文

一榻嗟容膝其如雨不堪人多愁桂玉天豈漏東南送
旅憐同病余生抱獨慚囊中阿堵物沽酒向誰酣

苦雨柬魏伯建

連朝依枕簟積雨幾時乾榴火枝頭暗茶烟竹裡寒尊
生甘社櫟佞佛禮旃檀為問參同子何時振羽翰

雨中不得過李迪却寄

昨日花間酌高談碣石宮今朝雲臥處徒自嘆飄蓬投
轄情何限搵瓢興不窮所嗟風雨惡一水湫絲桐

題栢欄寺

禮佛尋龍藏逢僧入虎溪諸天空色相雙樹是菩提拂
塵花初散攤經日未西白蓮堪結社臨去獨留題

武彝逢鍾明府

仙子棲真處烟霞別有天金芝懸五岳玉牒祝千年葉
縣窺丹竈桃源泛釣船風流歸茂宰紫氣望翩翩

武霞紀遊八首

鼓枻逢漁火披衣混鹿羣松含千嶂雨草亂一溪雲茅

狗從天下金雞隔水間
幔亭張樂處欲叩武夷君

其二

長嘯窺丹壑尋幽入翠微
風停鸞鶴駕露濕薜蘿衣
謝豹穿林去桃花夾岸飛
閑來尋釣艇不待乞漁磯

其三

竭來停杖屨訪道上清宮
翠落空潭水濤生萬壑風
芝苓羅斗口雞犬駐雲中
即此堪招隱何須問八公

其四

黃冠偏愛客載酒泛青溪春暖花爭發雲深鳥自啼芝
童調石髓玉女進刀圭興劇貪杯斡揮戈日未西

其五

鐵笛吹何處臨風促落梅虹橋人不見華表鶴初回九
轉留仙蛻千秋辨劫灰當年劉阮輩曾否到天台

其六

緱山長跨鶴葉縣亦飛鳬欲採三珠樹還藏五岳圖乾
魚傳漢峙小犬吠仙都試問避秦者於今尚有無

其七

高閣延清眺千崖氣渺茫鐘聲沉斷壑鳥影曳斜陽倚
竹風生籟聽泉月到牀胡麻如可飯未許問滄桑

其八

齋心探道錄細聽步虛聲不辨遊三島焉知駐五城忽
懸鮫室淚翻憶鹿門耕何處安期棗如瓜餉此生

仙門洞次蘇大禹參君韻

共有尋真興林巒望裡微朝乘青雀舫暮叩白雲扉澗

水寒侵榻巖花香撲衣僧來分乞食信宿欲忘歸

詠扇

漢宮紈扇動人鬪綺羅春素手披雲葉青娥媚月輪合
歡將錦字度曲繞梁塵莫作班姬怨翩翩咏洛神

夏日對酒

地僻便科髮一杯綠可親竹林元我輩河朔更何人却
暑揮團扇迎風岼角巾陶然拚酩酊莫是葛天民

冬日苦雨

二首

積雨愁無賴
蓬蒿日掩門
炊烟沉北舍
饑鳥噪孤村
南畝終何獲
東柯早已髡
沉吟空自苦
撫景暗銷魂

其二

簷前聲不絕
枕上聽來頻
乞米空懷帖
披裘那負薪
形骸枯欲折
童僕餒生嗔
如此蕭條色
誰堪原憲貧

同施仲宣黃惟聚堯衢遊九鯉湖分得齊字

洞壑尋真去
扶筇過苔溪
路隨青嶂轉
人與白雲齊
灌木寒風冷
閒猿隔水啼
具茨何處是
七聖望中迷

其二

托乘探仙錄三花駐馬蹄
泉聲喧萬壑雲氣護層梯
米秀騎玄鹿傳書倩碧雞
霞漿堪一醉掃石待留題

其三

瞥見如泥髓前身豈姓稽
湖澄涵白練山迥接青霓
六博仙初聚三珠鶴並棲
水晶簾正捲吾欲授刀圭

其四

倚杖看飛瀑空山日漸西
雲中思跨鯉水底欲燃犀
夢

覺星初聚詩成馬正嘶避秦還此地何日重攀躋

贈馬聚生 二首

大楚雄風起如雲竹馬迎地當閩斥鹵官即漢廷平荔
子香侵閣壺公翠入城花闌人吏散坐聽烏嚶嚶

其二

皎皎冰壺月郡齋樂事多衣沾萱草色酒對棣華歌一
雨蘇杭稻長松映薜蘿謝公詩滿卷倘許和羊何

夏日題東麓草堂 四首

出郭乘青雀看山坐水湄晴雲籠碧樹好鳥囀高枝把
酒荷香入攤書竹影移碩人棲此地長咏考槃詩

其二

池上涼風至荔枝香滿庭凌波雙鷺白捲幔數峰青綺
麗追金谷詠諧得歲星相將拚一醉身世等浮萍

其三

青蓮花乍吐長嘯一登臺芳樹搖青蓋輕霞動舉杯騷
人裁竹籜浣女摘楊梅為問西園客誰當繡虎才

其四

地僻便科髮烟霞更可親
何來垂白者得御草玄人
舞蝶窺花幄遊絲綰釣綸
溪山堪小隱莫問武陵津

宿林觀察園亭

二首

長歌招隱日別業舊西畊
花竹分三徑樓臺擁五城
雲含秋雨色樹帶海濤聲
把酒懽何極重憐下榻情

其二

郭外開精舍籃輿恣往還
虬龍潛巨壑猿鶴嘯空山
鑿

井偏投轄入林但閉關庭前饒玉樹倘許數追攀

三河舟中

漠漠千山雨飄飄一葉舟東南饒瘴癘身世任沉浮
亂吟逾苦風塵醉亦愁此心闕去住能不媿沙鷗

春日閒居

四首

浮海吾何敢龍蛇深自藏九章懷屈宋一榻傲羲皇
老乏還丹訣貧餘辟穀方試聽漁父曲吾道屬滄浪

其二

藝苑雲蒸日鄒枚尚典型登壇名跋扈傾國色娉婷獨
笑桑間餓誰憐澤畔吟朱絃千古調無夢不湘靈

其三

削迹渾無事為園抱甕勞逢人聊應馬玩世漫持螯洞
壑探蚪蚪江天縱羽毛不知吳市卒那用姓名逃

其四

高蹈非無意疎慵合廢居狂呼厨下酒竒愛帳中書著
述饒蓬鬢行藏自草廬冥冥鴻鵠舉矰繳竟何如

集宗振宅

海上春將盡，開尊興不孤。
青山寒擊筑，黃鳥間呼盧。
歲月甘龍卧，縱橫學狗屠。
風塵空在苒，酒盡更須酤。

麥斜巖別吳文仲比部

何事尋樵谷，空山路轉微。
岳蓮飛入座，巖桂撲行衣。
衆壑趨雲竇，孤峰對石扉。
徘徊珠樹鶴，明發又分飛。

冬夜徐茂吳集汪惟一邵長孺汪虞卿於建初寺

分得青字

金史四
卷二
寒月照松檺雲花香滿庭偶來滄海客一綴白榆星妙
偈叅詩入微鐘雜梵聽危樓頻徙倚醉眼落空青

卧遊室為圖南題

不須窮亥步一室足徜徉榻上逢宗炳書中得子長驂
雲低五岳吸露駐三光更有凌雲夢天孫贈錦裳

寄陳堯勳

十里江城路懷人過五陵交情深尺牘別夢醒孤燈我
已歌衰鳳君還賦大鵬高樓秋月白尊酒共誰登

夏日集普德寺竹林全林光甫張子明馬一卿

賦二首

習靜投蓮社逃名醉竹林可憐千古事獨契一時心祇
樹巢幽鳥繁雲結夕陰風來醒客夢溽暑豈相侵

其二

趺坐對琅玕空林夏亦寒清齋供野藪雜佩紉幽蘭灌
木鳴蟬靜孤村過雨殘支公能愛客不厭借蒲團

飲馬於階草堂全錢叔達康孟擔作

華筵開別墅坐對菊花香自愛傾醺醪何須典鷓鴣徵
歌多子夜縱酒得高陽秉燭忘歸去沉沉漏未央

康元龍招飲草堂分得心字

園林秋色淡置酒傍花陰隔竹寒蟬靜高樓宿霧深圖
書清玉案山水和瑤琴踏月聽歌去悠悠子夜心

鄱陽湖舟中

掛帆彭蠡澤渺渺但乘風日月涵元氣匡廬插太空鴻
多遵淺渚龍自遠幽宮何事鳩夷子飄然類轉蓬

海陵除夜全德夫宗振道昭邦彥作

雨雪欺雙鬢天涯那可親却憐今夜酒俱是舊遊人牛
馬懷他日龍蛇蟄此晨新詩裁刻燭讀罷倍傷神

元日

逆旅逢元日相看搃隱淪愁來詩不廢客久髮如新把
釣懷東海垂衣想北宸江湖濁酒在一醉任吾真

空囊

芳草經春歇陰雲入夏多鷺鷥羣水曲猿狖嘯巖阿白

髮何生理青山且放歌空囊歸未得倚棹笑蹉跎

雨中書所見

江村日日雨四月尚衣綿茆屋頽沙岼麥丘盡水田深
林喧宿鳥遠浦起寒煙何物禁愁得杖頭乏酒錢

至日

旅館逢長至蕭蕭雨雪時愁腸添一線短髮亂如絲天
地陽初轉風塵淚欲垂此生駒隙過但罄手中卮

過蘭溪投贈胡元瑞兼柬王元美先生

十載交遊冷新從穀水過上書違北闕講道老西河病
久青雲薄愁深白髮多郢人今已矣雪調向誰歌

九日仝陳別駕登白鶴峰

素節登高處相看豈故鄉乾坤同逆旅歲月又重陽
睨孤城暮瀑湲二水長歸心渾欲折離畔菊初黃

歲暮懷歸

天涯雙鬢改雨雪歲將徂自笑窮愁老誰云去住孤
詩篇銷日月酒態傲江湖何限還家夢滄洲一釣徒

送李茂承之白下

任達雲間彥千秋一季鷹若非君落拓誰與古憑陵
桃葉春風艇曇花夜月燈六朝多勝迹幽興日堪乘

雨中集洪仲昭樓居全詹淑正何行吉管象吉殷
公覲分得樽字

南樓雲裡迥星斗若堪捫邀客秋初爽看山日漸昏
雨聲寒几席燭影亂金樽莫問城笳起新詩坐夜論

登清水巖

鷲嶺開雲際扶藜登眺初不知身歷險只覺氣凌虛樓
觀空中盡松蘿象外疎陶然參繡佛何物是真如

春日懷所知

二首

眼看春草色忽動故園吟入社分僧供臨流聽鳥音三
洲滄海近九漈白雲深腸斷離羣者徒勞夢裡尋

其二

一春多苦雨落魄願多違白雪生明鏡緇塵染素衣溪
流清繞舍竹影亂侵扉若問江湖興朝朝咏式微

度分水關

五載還鄉客
嚶嚶鳥戀群
遠來人漸老
閩越水初分
遠樹含烟瘴
諸天幻火雲
歸心懸落日
處處亂蟬聞

賦得桐江水寄許才甫

碧綠桐江水
羊裘隱在茲
灘聲流日月
山色擁玻璃
林莽供樵爨
烟波理釣絲
君家欲洗耳
舍此更何之

午日泛舟懷古

載酒當佳節
臨流感慨深
笙歌喧遠浦
烟雨散平林
抱

石千秋淚懷沙午日心遺風留澤畔落日想行吟

題君霖六書樓

公子開高閣參差碧漢齊書應工倒薤帙已映燃藜翼
軫光堪摘匡廬望不迷幾人能載酒時上白雲梯

開元寺對月懷歸

蘭若春晴夜橫空片月新諸天澄素影初地絕輕塵喪
亂長為客婵娟故惱人青山歸去好莫遣鬢如銀

久不得子韓粵中消息悵然有懷

無賴炎州客漂零胡不歸天涯雙鬢改嶺外尺書稀
珠探鮫人室帆遙燕子磯何時重握手一醉典春衣

水晶宮有懷

白雲隨杖屨閒到赤松家倚檻聽流水懷人怨落花
遊仙長枕石避世飽餐霞未了浮生事青門老種瓜

泊都昌

白髮甘丘壑胡為嘆轉蓬乍看西過雨旋起北來風
尺素思雙鯉扁舟漲片鴻囊中金已罄那得醉新豐

硤中避暑全郭次甫龍君善莊靜甫汪仲淹潘景
升劉季然分得侵字

仙源迷咫尺暫臥白雲深閣對懸崖靜庭分灌木陰松
濤醒鹿夢洞壑起龍吟縱飲追河朔都忘暑氣侵

集鼓山寺全從甫鄭堯鄰吳道敬吳贊庭陳萬里

作

陶潛棲白社謝眺賦青山地似藤蘿外人多伯仲間裁
詩幽鳥下移石暮雲還但得如渥酒沉冥學閉關

讀射陽湖稿贈楊肖韓

四傑推楊炯新詩郢調孤柳移彭澤縣花匝射陽湖丹
竈開仙令滄洲老釣徒驪龍銜片月應識夜光珠

鵲湖館中別詹修之

二首

余向江南去君為薊北行舟車含別淚風雨戀交情燕
市初求駿湘纍自采蘅天涯如見月莫負歲寒盟

其二

一朝復一夕身世似飄蓬雁度寒雲外鶯啼細雨中形

骸嗟我老肝膽與君同岐路愁分手勞歌思不窮

建安別諸祖守憲弟道佩

全舟泝建水岐路別如何旅鬢秋霜短鄉心夜雨多寒
鴻依海島巖狖嘯烟蘿回首三江水何時共釣蓑

寄贈吳體中明府

雙鳬飛赤縣才子重南金花吐臨川筆風清單父琴千
峰澄碧水片月照寒林未得參禪去徒懷仰止心

黃貞甫讀書靈隱寺禪樓賦贈

之子窮經處高樓拱翠巒龍疑盤洞壑鳳欲啄琅玕星
斗揮毫亂烟霞拂枕寒支牀雞骨在臨別勸加餐

集林晉伯霞村別業

園林多秀色載酒趣花朝聽鳥凭江檻看雲度野橋曲
池含月影列嶂亂霞標乘興還過此無勞折簡招

送林德夫之淮南

相逢秋已暮又爾別夫君千里揚帆去三山落葉紛吳
陵迷夜雪楚水隔寒雲日夕歌叢桂還招海上羣

哭林翼甫

聞汝風流盡青春，可哀江湖愁裡隔。
形影夢中圓片玉，埋秋草孤琴掩夜臺。
天涯交誼在無計，奠椒杯。

訪徐唯起綠玉齋，喜陳伯孺僧如翰並至席上懷。

惟和

城隅開一徑，曳杖到玄亭。
山色窓中出，秋聲竹裡聽。
焚香參繡佛，解佩贈湘靈。
不盡懷人意，寒雲隱翠屏。

贈松溪昌明府

灌壇行雨令千載復南州製錦花為縣鳴琴月滿樓雙
溪分曲水五柳繫仙舟我有湛盧興何時挾蒯緱

送金開府還武林

五首

匡時推建節感事遂初衣威震彭湖外功成越徼歸風
霜依另府烟雨戀漁磯身去名彌重未應便息機

其二

八載紆南顧重臣兩鬢絲艱危滿眼急牢落寸心知雁
度驚風冷帆搖帶雪遲五湖煙月好長嘯學鸛夷

其三

東南深保障行止却踟躕羽檄今初定軍儲更有餘自
甘隱豹意那問樂羊書父老并州淚攀留擁後車

其四

孤山原結社歸去問吾曹蘇小門前柳蔣公徑裡蒿夢
魂消策海詞賦盛觀濤不淺山陰興願追載酒舸

其五

心事明天日才猷邁伯王暫拋魚鳥陣一臥水雲鄉葛

井丹初熟甄侯澤正長安危須將相元是郭汾陽

曹能始王玉生沈從先同入梅巖余躡其後不

及
二首

乘舟遊汗漫倚杖陟崔嵬晚瀨千盤雨春梯百丈苔餐霞元吏隱采秀搃仙才所媿非禽向何緣共往來

其二

謝客耽山水梅生厭市廛桃源初問路桂樹不知年梁糗青泥繕刀圭白日傳如何乖羽翼清夜夢相牽

八詠禁體

夕陽樓

十二凌霄迴雕甍駐晚暉
層霞侵繡闥返照逗朱扉
倚檻羣鴉集巡簷乳燕飛
晚粧羞獨上花月隔音徽

流黃月

少婦停梭處銀河玉鏡飛
蟾窺雙鑷影兔射七襄機
促織聲偏急合歡信轉稀
關山吹玉笛何處是金微

蘆花風

蘋末商飈動飄飄舞絮狂行空疑泛梗著樹若飛霜
水魚爭沫披雲雁作行所嗟人遠戍秋老未還鄉

芭蕉雨

綺閣背園林晴光滿綠陰忽聞聲浙瀝自覺氣蕭森
夢醒涼簟清商咽素衾博山爐欲燼歌枕聽餘音

霜前葉

園林秋色淡青女信先知憔悴自今日歲華非故枝
庭波欲起金井露為期賦質元輕薄托根終不移

松上雪

架壑材凌勁孤標壓六雲龍疑蟠玉壘鶴自下青城氣
肅徂徠節光浮琥珀精肯隨桃李艷惟結歲寒盟

畫堂燕

甲第開王謝雙棲試羽裳空巢依藻梲將子下雕梁尾
翦差池影泥含百和香誰堪蕩子婦刺繡掩空房

沙場雁

陰磧排雲下邊庭唳月新稻梁懷漢苑羽翼染沙塵避

繳愁分獵銜蘆怯渡津青閨書不到魂斷玉關人

趙仁甫招飲芝園全顏左史李茂才作

華亭臨曲水避暑更相宜日影松陰薄蟬聲閣外遲尋
詩猷竹徑佐酒薦園葵池上涼風滿何妨倒接羅

訪汪仲嘉松明山中時有傳余物化者相見愕然

醉後宿肇林賦此

故人江左別風雨十年多萬里空垂淚蓬門且放歌張
燈如寤寐把酒慰蹉跎託宿僧僚近往來步履過

過汪仲淹故居感懷喜見其子無央

一入千秋里白榆感舊遊何年埋玉樹此日邈丹丘花
濕平蕪雨蟬鳴灌木秋不孤嵇紹在腰下解吳鉤

雨中柬陳魯彥

空門何寂寂積雨暗松枝抱病衣偏冷安貧鳥亦饑看
經先嗽齒斷酒不攢眉徙倚孤亭上頻吟伐木詩

雨中汪仲嘉惠米却謝以詩

雙鬢愁中短六時客裏長何期三日雨更惹九迴腸誰

授餐霞訣空餘辟穀方故人分玉粒聽雨飽繩床

紫陽道中逢余珍甫

憶昔夷門別風塵閱歲華君懷新甫柏我種五侯瓜乍
見驚蓬鬢相携入酒家明朝分羽翼依舊隔天涯

和汪司馬寄題仙巖詩為雲池上人作

青蓮初架壑勝地已聲聞未得瞻花雨徒然想法雲幽
愁歸自在究竟搃無文所願從師去醍醐乞幾分

贈胡廣文

才名高海國振鐸向閩天桃李沾春雨魚龍破晚烟傳
經垂絳帳對客坐青氍獨有凌雲氣時懸北斗邊

秋日登釣臺

四首

天涯秋乍轉重眺子陵臺潭古魚龍伏山空鶴鶴來自
耽邱壑老那問伯王才所媿扁舟客忘機鳥轉猜

其二

七里終垂釣高風薄九霄蕭曹偏佐漢巢許豈臣堯地
僻連桑野臺孤控斗杓羊裘何處問秋樹正鳴蜩

其三

犯坐星為客狂奴重此邦功雖希渭水計自老湘江古
洞無眠鹿荒祠有吠庖臨風聽短笛調入水雲腔

其四

憑高一長嘯眼底盡飛潛齊國今非漢漁人舊是嚴風
號流水轉雲散亂峰尖興盡乘槎去松梢吐玉蟾

槁李別張子明 二首

汗漫逢長水愁心感歲華非關貧刺骨那得遠辭家雙

鬢經秋短孤鴻帶日斜
露團芳草夕何處咏蒹葭

其二

異地憐同病君歸不可留
弟兄俱白首風月正清秋
失路悲寒雁忘機愧野鷗
一杯聊惜別不為答吳鉤

桐江舟中懷金中丞

鼓棹今何適桐廬際曉行
山多藏玉笈水不染塵纓
別洞龍眠穩長空鶴唳清
仙人雲樹裡猶似隔蓬瀛

贈章少府

豫章需上國一命佐鳴琴
寫借雙鳬影庭分五柳陰
賢勞推驥足撫字見鸞心
自是神仙尉鶯聲囀上林

秋日同張子明王德載陶大治訪王上之留飲舟

回作

共泛彪湖棹言尋處士家
鹿門歸采藥龍井喚烹茶
玉塵談名理青蓮供法華
溯洄秋色裡浥露咏蒹葭

送了義上人還普陀

雲中開寶刹碧海信浮槎
一火空塵劫諸天護法華
隨

綠飛片錫發願禮三花從此皈依處禪心定洛迦

陳元朋張紹和二孝廉夜集游宗振嘉樹林即席

分韻二首

楚楚談天客歸來自帝州詎堪逃竹所未許老糟丘投
轄星窺井銜杯月滿樓相逢歡卜夜涼氣颯疑秋

其二

二妙才名重論交愜素心斗牛雙入佩山水獨知音醉
月穿蘿徑乘風嘯竹林圖南絕跋扈莫遣鬢蕭森

夏日林晉伯邀蔡伯達明府避暑清溪同林元和

錢叔達黃堯衢柯爾珍作

別墅清溪曲竇筵但薦瓜舒荷風未綻扶荔日初斜波
泛空江月香聞隔岼花留連還秉燭盤谷欲移家

題隆甫小像

李鷹稱任達之子慕高風貌豈緣詩瘦愁多入賦工雲
中惟附驥海上自冥鴻色相無勞著萬緣悉已空

壽夏司馬

四首

龔黃推上佐曾識漢庭名北海春初煖南山月正明家
傳金粟盛官比玉壺清一自條風起謳歌處處聲

其二

司馬雲臺望大夫雪苑才清風聞八郡紫氣近三台閣
靜魚鰓挂庭閣鶴正迴此時瞻法象應可擬蓬萊

其三

聖朝崇展驥仙籍重駢麟名在丹臺舊榮分海甸新占
星知是歲問俗想行春即此棠陰茂還看飾羽輪

其四

降嶽傳周典，偷桃憶漢官。
仙風應不減，吏道亦何難。
樓櫓烽烟息，菁莪湛露圓。
岡陵慚共祝，敢謂臭如蘭。

林太守元和招遊鳳林樂丘

諱鳴盛萬曆甲戌進士

相逢半隱逸，太守醉稱翁。
中散情多放，榮期樂未窮。
溪毛蘋藻綠，山菓荔枝紅。
把酒聽新瀑，長松日暮風。

送張証性之粵

竹裡嘯清秋，憐君復遠遊。
丹已尋勾漏，藥自采羅浮。
老

驥懷千里名山動四愁何時歸故國訪我白蘋洲

賦得東山屐

謝公高卧日江左卜安危偏縱登山屐長吟在澗詩烟霞隨緩步松竹結幽期雅量誰能測猶傳折屐時

五月三日全諸君泛舟

二首

南薰吹灌木載酒命蘭舟興動滄浪水香生杜若洲清言諧夙契大塊等浮漚俱聲杯中物獨醒空自愁

其二

海曲分南北為歡駕彩虹三江澄碧浪五月御薰風蒲
酒漁郎醉菱歌浣女工眷茲遊汗漫何必問新豐

紙帳

豈厭流蘇艷還將繭素裁連牀堪染翰捲幔欲妝梅匹
練分雲出羅紋帶月開箇中人似玉曾否夢陽臺

挽孫司理二首

豈厭天台賦胡然遽返真法星沉昨夜仙錄註茲辰聞
海餘波潤吳江舊業貧片心留一劍灑淚挂松筠

其二

垂虹何處是歸櫬但扁舟鶴向青城唳馬含白練愁琴
書孤索冷蘋藻五湖秋贏得與人頌精靈逝不留

山行有懷

欲采山中秀虬髯未可逢薊門違鳳嘯鄭圃戀仙蹤雲
氣團巖竹泉聲雜澗松暝投何處宿隔水動疎鐘

歲暮咏懷兼呈唐明府巫太學諸君

四首

訪戴停孤棹江城歲欲闌同雲一夜合積雪四山寒落

魄詩堪廢愁腸酒轉寬
河陽花漸發倚杖及春看

其二

雨雪空齋暝蕭然此抱疴
孤蓬遊已倦長缺向誰歌
竹翠侵衣濕溪聲入枕多
主人能愛客翻不厭婆婆

其三

犬馬嗟余齒蹉跎已古稀
百年猶轉盼三逕詎忘歸
柳色含烟嫩梅花帶雨飛
鄉心逐流水言采故山薇

其四

垂老長為客淹留
媿此身如何生白室
偏愛草玄人臘酒
傾三雅春盤薦五辛
故鄉千里外兒女夢中親

元日用元禮韻

乘春初出郭峽口一亭開
不為條風暖何緣緩步來
魚翻池上藻鳥啄澗邊梅
欲倚盧敖杖翩翩上九垓

早春集光嚴寺

緩步躋山寺羈心感歲華
經初翻貝葉酒已厭椒花
白髮逃方外青山夢海涯
何如雙樹鳥日夕聽三車

早春雷孤林招集西郊

乘春多載酒把臂竹林中
草細沾新雨池平漾午風
人家多杜曲雞犬似新豐
肯惜如泥醉勞生嘆轉蓬

早春次吳希晚韻

歲事才三日寒陰日漸消
忽尋芳草去不待美人招
煮茗初刪竹傾醪更著椒
春風輕拂柳未許折柔條

雨中排悶兼呈巫維貞

四首

竹徑藏春色蘭皋帶雨聲
年華方七日孤客最關情
薜

荔多垂幄滄浪足濯纓田家東作起何事不歸耕

其二

此地逢人日空齋一雨寒如何春已到轉覺路行難
莫
英烟初暝梨花雪欲殘故園心一片安得借飛翰

其三

短髮不堪把流光歲已移潛魚忘巨壑倦鳥托深枝風
雨貂仍敝關山雁故遲淹留愁不盡隱几一裁詩

其四

羈棲魂欲斷暮雨不堪聞懷土憐王粲談玄愧子雲
燈懸金粟影爐帶玉蘭薰芳草王孫路何當醉裏分

送周士龍入粵魚報黃元白陳爾美

寒色擁江天離魂倍黯然有懷多琬琰相贈豈蘭荃
嘯月嵒山頂停雲瘴海邊同聲如有問生計老逃禪

午日分賦得桃印符

綵絲逢令節仙篆表靈符五木精初聚千門祟已通
采蓮喧競渡鬪草艷當壚別有瀟湘意臨流弔左徒

悼亡詩為嵇士茂題卷

四首

嵇生竹林士伉儷繫幽精神爽窺圓照腸愁寄短聲帳
中形影在花下去來輕孫楚哀流電臨風淚滿纓

其二

帶幙淒涼夜孤燈思不禁為雲還入夢奔月亦何心氣
咽鳳凰管香銷翡翠衾一彈瑤瑟罷山水動哀音

其三

菱鏡何能掩蘭房此日親金精空墜地玉樹已成塵虹

斷藍橋魄雲歸洛浦神幽香還滿室曾是不歸人

其四

一展悼亡卷悲風颯颯來香魂終不返玉貌轉堪猜淚
竭潘郎句心憐謝韞才鼓盆非不達五恨總難裁

山中避暑和游元封夏日閒居十首

游及遠字元封日並字布

衣

河朔耽名飲幽棲性所怡鉤簾時看竹隱几漫裁詩溽
暑過三伏菩提借一枝若非同調者誰結白雲期

其二

習靜來初地。賫糧不滿囊。恒河晴可濯。祇樹午偏涼。已
証傳燈錄。何論辟穀方。攤經消永日。更宿贊公房。

其三

垂老猖狂態。當年契若翁。利名捐物外。賢聖辨杯中。陰
剌門前柳。材留爨下桐。羲皇何不作。枕石咏南風。

其四

眷此清涼界。諸天聚火雲。地含秋水碧。巖擁綠苔紋。龍

藏空中見曹溪定裡聞幽偏堪養拙猿鶴若為羣

其五

何必探滄海尼珠得比丘年雖過牧豕心已老盟鷗紈
扇堪題咏酒杯但拍浮齋心渾不染剥啄厭相求

其六

碧樹棲羣雀清風咽暮蟬登山憐有屐掛壁笑無絃混
世青門業勞生絳縣年何年超苦海聊此學逃禪

其七

地僻宜消夏入林已浹旬雲迷丹壑迴雨濯綠荷新伏
枕多嘗藥披裘且負薪歌聲出金石原憲未全貧

其八

刹自前朝建誰參最上乘無生惟佞佛有髮也呼僧榻
為棲雲下樓因嘯月登此中元空洞何愛亦何憎

其九

偃蹇松林下停雲有所思關山遊子夢風月美人期松
覆雲陰薄藤垂日影遲沉憂何以遣賴有手中卮

其十

乾坤無盡意長嘯辟支巔
隣父頻携酒官家少索錢
摘瓜終老圃種秫僅荒田
身世甘枯槁浮名安足傳

秋日閒居和張隆甫韻

青山吟謝眺白馬賦陳思
却厭梧桐落兼聞蟋蟀悲
才心空自老古調竟誰期
若問柴桑計蕭條五柳枝

其二

人生非金石搖落重含情
林暝螢初度汀寒雁數聲
科

頭山欲瘦濯足水偏清
枯槁尋常事安知身後名

其三

地僻人稀到清秋
晝掩關世隨滄海
變心與白雲閒
烟淡縈長薄林疎
出遠山忽聞樵唱
起鴉帶夕陽還

其四

萬籟空中發淒涼
枕上聞道窮元不
病身隱絕焉文來
去澄江月浮沉薄
海雲壚頭無濁酒
何以遣塵氛

其五

著屐尋丘壑乾坤一眺中終南多捷徑潁水邈高風避
世青門拙問年絳縣同草茆懷耿耿帝座豈堪通

其六

草際沙鷗集江村事事幽才非堪傲世賦敢附悲秋風
冷初飄籜雲低半入樓無營耽曠達嵇阮或同流

其七

百歲嗟駒隙無勞較短長但拚人醉月莫問鬢沾霜道
與漁樵狎情難犬馬忘誦詩哀岵屺淚滿白雲鄉

其八

一間容膝地何處想樓臺土木形全毀星霜鬢屢催飄
零荷葉佩潦倒菊花杯不是求羊輩蓬門莫浪開

其九

水天渾一色彷彿見真吾自愛逃空谷深慚涉畏途松
風吹草榻海月掛冰壺裘馬飛揚態從他競五都

其十

文園拋綠綺病渴却為誰味似蘭初臭心悲石可移南

陽龍欲嘯東海釣方垂山水知音者寥寥未有期

春日幽居十首和薛景登韻

薛希元字景登布衣莆人

春風何淡蕩疎拙戀閒居一著登山屐如乘下澤車
明農憂旱澇讀易悟乘除偃蹇從吾道無勞問索虛

其二

科頭過歲月草澤一閒人織屨終違俗賣漿偶比鄰
時名龍卧穩春夢蝶飛頻同病憐嵇阮壚頭日可親

其三

濁酒耽陶令新詩擬惠休人驚雙鬢短花簇數枝稠負
漢終投閣懷秦獨倚樓吾慚三老後曳杖亦名鳩

其四

垂釣無他事沙邊繫小舠愁腸思蹈海病色起觀濤積
霧炊烟濕奔泉激石號寰區多震蕩何計定金敖

其五

身世看如此三洲只敝廬持齋寒食後脩禊暮春初立
壑孤雲迴琴樽一榻餘倦來時隱几拋却養生書

其六

薄暮收魚筍呼童掩竹關
乘風非北牖步月即東山
湖海登樓倦園林抱甕閒
美人安可望厭說落花班

其七

幾年無戰伐何事亟傳烽
誰借軍中箸長驅海上檣
檄堪清瘴癘珮欲解芙蓉
不盡憂時意荒村聽暮春

其八

岸幘松林下銜杯水竹前
清狂非玩世沉醉近逃禪
風

雨催春色藤蘿逗暝烟前身疑畢卓也作甕頭眠

其九

白首機心息何妨識者稀糟丘堪自老斥鷃豈高飛豪
俠千金盡窮愁萬事遠首陽人不作薄米故山薇

其十

懸鶉依陋巷妻子任長貧高蹈懷千古勞生笑此辰乾
坤寬荷鍾草莽竊沾巾五柳青青色依然不惹塵

寄懷鄭景愛

溪流喧入枕落日漫懷人
偃蹇俱違俗艱危各問津
春從多病過鬢為苦吟新
何日囊山社尋僧重結鄰

寄游元封

心交淡似水夙昔別郊垌
夢斷天涯雨愁多水上萍
關山遙度雁節序暗流螢
若醉江樓月曾知澤畔醒

酬楊伯海見贈

萬事皆春夢浮生枉自勞
乾坤容此物湖海傲吾曹
身後名何益杯中興獨豪
醒來行澤畔寥落楚人騷

讀方員外浮湘集賦贈 二首

一代文章伯風流漢子長
扁舟浮萬里高咏滿三湘
游女捐瓊佩騷人製野裳
青雲詞賦色千載竝滄浪

其二

不讀西征賦誰知大雅吟
衡山秋色壯湘水暮雲深
二女重華淚孤臣衆妬心
應知揺彩筆山鬼嘯空林

秋日薜荔園書懷

一簾黃葉雨高枕白雲秋
天地甘貧病蓬蒿自去留
魚

腸空結客猿臂豈封侯所以忘機者臨流狎海鷗

其二

悲風鳴大壑落葉滿荒苔倦鳥投林盡浮雲度海來文章裁短褐日月寄深杯中散交遊絕柴門晝不開

其三

一徑萋寒卉孤村逗夕陽溪流環遠近樹影散池塘有客懷餐菊無人問翳桑端居空自好山際白雲翔

其四

秋色江村冷，兼之四壁貧。圖書供歲月，牛馬任風塵。蹈
海齊高士，懷沙楚逐臣。吾生空落落，華髮幾莖新。

暮秋即事懷許希旦

籬菊還堪把，蕭條酒一尊。吟詩生白髮，聽鳥到黃昏。亂
竹棲幽徑，微雲綴遠村。風流高月旦，欲向汝南論。

秋日訪張明府同游山人賦

二首

偃蹇嗟吾黨，相過豈世情。途窮詩作祟，俗薄酒為名。月
朗花陰靜，風微竹影清。百年拚一醉，劉阮或同聲。

其二

秋氣生林薄扁舟訪隱居青山生計在白眼世情疎陶
令貧耽酒虞卿老著書飛來天外月不醉欲何如

秋日集柯堯叟艸堂得斜字

看竹向誰家柯亭興不賒開尊迎五柳染翰麗三花閣
迴雲微度林深日易斜猖狂吾黨在月下鬪瑤華

冬日同游宗謙余思澄泛木蘭作

二首

為有尋真興歡乘載酒船溪寒雲翳日谷迴樹浮天龍

氣盤沙岬鷗羣散野田共歌招隱賦揮手弄蒼烟

其二

千秋含朔氣天地有無間風送扁舟客雲隨孤鳥還浮
生逃濁酒高眼傲青山勝地藤蘿古遊人幾醉攀

別方子韓

六首

湖海憐同病風塵笑獨醒投人雙白璧憤世一青萍落
魄文章壯狂歌涕淚零鵬搏還爾輩吾道托鴻冥

其二

飄零誰下榻偃蹇獨登樓交態黃金變窮途白髮愁飛
揚裁郢曲睥睨看吳鉤莫灑楊朱淚乾坤一葉舟

其三

司馬才名大元龍客禮疎形骸長自放詞賦好誰噓把
袂看時事銜杯嘆索居不知萍梗跡飄泊竟何如

其四

問奇曾載酒聽雨幾聯牀久客何蕭索悲歌故慨慷豈
儒從側目世路枉迴腸我輩風流在何妨入醉鄉

其五

才名空落落踪跡竟栖栖
駿骨千金妬羊腸九坂迷人
從天外別鳥似故鄉啼
莫笑交遊絕前身是姓嵇

其六

江湖雙別淚天地一狂生
有客同王粲何人稱禰衡
綈袍風雨色樽酒別離情
君自懷明月終償十五城

蚤春陪舅林郡丞暨黃金之許希旦姚體恪體貞

兄弟集鄭氏北郭別業

二首

春入柳條新郊遊岸角中青山環別業芳樹媚佳辰陶
謝俱詞客荆高總酒人年華駒過隙懽賞劇相親

其二

草閣背城開何人載酒來偶因隨杖屨共此破莓苔韋
曲尋春宴梁園作賦才留連情未已城角暮聲哀

白沙謁陳憲副墓

公嘗亟稱余詩
故有知音之感

佳氣紛沙渚新阡紫翠中停車悲宿草投轄想高風兩
漢文章色三吳戰伐功嗟余後死者流水恨無窮

謁林和靖處士墓

停舟訪林壑猿鳥若為羣
秋色西湖水前朝處士墳
山含三竺雨柳帶六橋雲
千古遺踪在梅花夢見君

贈袁景從

袁生稟異姿偃蹇尚藜藿
白鳳夢常懸青雲名自薄
悠悠海上鷗矯矯空中鶴
為報草玄人吾今亦寂寞

立秋夜呈吳子從

大火西流夕庭柯一葉飛
如何萍梗跡猶與故山違
白

露團芳草流螢度翠微涼風吹客夢歸思共依依

酬蕭漢卿

覽鏡驚華髮看花憶故廬五湖非范蠡四壁即相如已
悔離蟲技長懷種樹書行藏君莫問吾道自樵漁

送陳本虞遊燕訪其弟本容

伏劍辭吾黨翩翩向帝州謝家春草夢易水薊門秋俠
氣傾三輔詩名動五侯黃金燕市裡早晚索驂騑

同游宗謙集馬從甫草堂作

清尊開別墅慷慨命吾徒子夜吳歌轉陽春郢調孤凌
雲名不薄醉月氣何粗栗里風流在重過有酒無

寄鄭兆采

苦憶談天客江城久索居山林余小隱詞賦爾長驅徑
草縈書帶巘花映綺疏九華懸片月西望欲踟躕

關山月

上谷風塵起良人去不歸青樓多涕淚紫塞隔音徽月
下秋砧急庭前桐葉飛榆關萬里道何處寄寒衣

泊平浦作

天涯飄泊處日暮動深情身世隨蓬轉關山對月明
西江初輓粟南粵未休兵如此艱難道非關學請纓

沙陽守漲作

積雨溪初漲孤舟泊水涯荒村餘鳥雀落日走龍蛇
偃蹇成何事飄零祇自嗟隔林烟火起暫向酒人家

程鄉舟中

乘舟來百粵五月尚披裘瘴氣晴飛雨溪風颯似秋
丈

章非屈宋踪跡老窮愁此際思鄉淚潺湲水共流

雨泊作

西風吹大漠遠客滯歸舟雨暗城陰色雲含海上愁潮
聲來卧榻盡角起層樓那得新豐酒悠然命馬周

題竹林七賢圖

昔時竹林人俱是清狂客逃名却尚奇縱酒已成癖天
地總虛無老莊與朝夕吾生後汝期感慨茲遺跡

題余思澄超然樓次柯堯叟韻

高閣清陰合，乘秋曳履過。憑軒窮海岳，把酒命羊何。落日低雙鳥，微雲淡九河。懸知占太史，座上德星多。

雨中登江天閣

積雨依山寺，憑高思渺茫。潮聲迴片石，雲氣暗空廊。地控南徐險，天連北斗長。淒淒何處笛，此調是滄浪。

雨中諸君子攜歌者過飲草堂醉後賦此

二首

十日嗟余病，扁舟見汝情。清秋來舊侶，子夜轉新聲。天地容吾黨，文章誤此生。但教千日醉，不必問陰晴。

其二

何來白眼客樽酒共留連
詞藻凌三晉風流恰七賢
蟬聲消暑氣山色帶秋烟
況有何戡在酣歌五柳前

夏日全陳元甫僧宏思過萬松菴盛仲文讀書處
得中字

地僻蓬門靜松蘿一徑通
薰風迴石榻幽梵出花叢
問字通揚子談經對遠公
興闌尊酒罷歸路月明中

春日全游宗謙方行漸柯堯滕東山晚眺作

春色在東山登臨紫翠間孤城懸落日雙樹隱禪關
草自香臺積僧從下界還欲除生滅念惟與白雲閒

人日冶城山齋呈吳子從

二首

異地逢人日空齋滯客星愁來雙鬢白病起數峰青
弱柳矜明媚飛鴻去杳冥途窮休下淚身世等浮萍

其二

紫氣秦淮合鐘陵杳靄間那知逢七日又是客三山
柳色將春到禽聲對酒閒故園花漸發惆悵未言還

張子明馬一卿過山居有作走筆答之

留滯江東客何來宿北城
高齋堪伏枕濁酒且逃名
竹暹分秋色松濤雜梵聲
風流非二仲誰過蔣元卿

同蔡真卿余鞠夫登淮陰城

雉堞連雲峻東流楚水深
以余多感慨與爾一登臨
春草王孫淚烟塵國士心
城邊無漂母誰復飯淮陰

秋夜月全馬從甫許希旦方子韓作

霄漢涓涓淨孤輪何處安
西風吹不墮永夜此相看
影

入疎林破光侵草榻寒年年一樽酒憔悴倚闌干

安仁夜泊寄立朝立虞諸叔

落魄堪如此江城又泊船星臨三楚客雁斷七閩天鬢
似悲秋白言非解事玄刀頭心欲折誰乞買山錢

戊子即事

寥落天涯客沉吟感慨生魚龍何偃蹇豺虎亦縱橫餓
芋中原色仳離故國情閭閻憂不細無計答承明

冬夜全林靖初林方道陳廷選林奉初余伯薦柯

世顯集鄭兆相宅

片月移庭樹花陰客乍來張燈娛永夕促席罄深杯歌
徹湘中曲談傾稷下才留連拚一醉肯惜玉山頽

同鄔汝翼馮咸甫顯甫姜元從集於鄔先南樓

開尊非北海作賦自南樓即對青山色難消白髮愁寒
潮喧渡口落日掛城頭酩酊狂相傍乾坤一海鷗

西湖同蔡幼公馮從甫馮咸甫作

湖天何渺渺載酒鏡中遊雙塔凌雲起孤山抱日流香

生舉杜佩歌動采蓮舟更愛忘機鳥滄波任去留

雨中集游元封雙璧堂因懷其尊人宗謙

游日並
字宗謙

布衣

片雨晝冥冥入簾書帶青柳條低結冷花萼散微馨校
字烏知學聞詩鯉過庭窮交吳楚別忽忽七流螢

南浦寄黃惟雅

江夏憐新別論交十載情停舟依柘浦下榻戀芝城風
雨花間嘯琴樽竹下迎即今餘夢寐隔水聽啼鶯

春夜集黃惟雅草堂全陳彥宗藍翰卿作

銀燭吐珠光
邀賓醉艸堂
巖山星乍弄
湘浦色初張
卮進長生酒
詩賡大雅章
同心厭此夜
漫說少年場

舟中懷鞠夫

落日照長川
孤舟思渺然
江村滄靄外
城郭白雲邊
寂寞留玄草
猖狂乏酒錢
不知之子別
把臂是何年

雲來閣玩月同陳堯勲陳公衡作

置酒延詞客
壺公秀可餐
欲披雲外影
坐待月華看
河

漢金波淡蟾蜍玉露寒若非班氏女誰解賦齊紈

同祖仁甫李得名楊唯光飲谷神觀

山館饒脩竹風來暑氣微仙童初進酒詞客且披衣江
濶雲初斂林深鳥不飛上昇傳此地藉草醉斜暉

同黃叔範飲顏廷渠舟中分得侯字

共上木蘭舟滄波狎野鷗寒山環水驛落日隱城樓竹
葉傾三斗魚鯖薄五侯那堪同調者歲歲動離愁

智泉流觴

永和修禊日勝事至今存
衣染春雲色杯停曲水痕
東來千雉合北望九華尊
但得蘭亭趣桃源未可論

烏石山避暑

靈巖標北郭下瞰白雲鄉
塔影懸初地松濤落上方
看雲頻枕石聞梵欲依牀
避暑疑河朔傳杯樂未央

春日訪方子舉伯純諸友
南山讀書處醉後留題
南山幽僻處倚杖問僧家
一徑通玄草雙林吐覺花
春深寒雨細谷迥暮雲斜
尊酒交歡罷齋心禮法華

登名山寺宿高蓋蘭若紀興

出郭饒幽興，崎嶇嶺復溪。
千重青嶂合，萬頃白雲低。
澗水鳴秋雨，田家報午雞。
籃輿乘偃蹇，端欲問招提。

其二

南宗初問道，振策陟崔嵬。
寶座參雲合，珠簾射日開。
鳳停千佛嶺，龜傍九蓮臺。
欲見人天界，臨池笑劫灰。

其三

何處窮蓬島，孤高有此峰。
飛烟空世眼，積翠洒吾胸。
鳴

磬馴簷鴿談經起鉢龍諸天瞻咫尺佞佛得何顯

其四

鷲嶺疑茲地真堪奉法王芙蓉雲外聳簷蔔雨中香山
色含晴靄鐘聲帶夕陽下方聊借榻蘭若一燈光

題朱醫社

吾愛朱公社壺邱水石涼壽齊椿樹永春滿橘花香寶
錄憑雲護靈旗薄日揚齋心求服食隱隱見中黃

九鯉湖即事

步入桃源路山空日未昏
花明丹竈火犬吠酒家村
石竅通鰲極濤聲激海門
翻思生羽翼長嘯躡崑崙

送立斐叔之延平

朔風日以厲躡蹻欲何之
人與壺山別舟從劍水移
九峰堪載酒八角好裁詩
倘憶林間竹歸來待幾時

輓果軒叔二首

神理冥冥在淒風
斷竹林泣誰明璞玉教
獨費簞瓢金秦市
春休杵雍門響絕琴
生前徒識汝酹酒意難禁

其二

病豈休文似
名胡李賀同
身名遺草在
世事落花空
棋墅明涼月
玄亭響夜蟲
攫金曾不理
意氣古人中

哭王長公

三首

忽報中台折
何人不黯然
弇山寒舊日
婁水咽新阡
萬象收元氣
千秋罷太玄
生芻陳一束
無計問青天

其二

勛業三朝老
文章百代師
條為鴻鵠舉
長與白雲期
海

岳空盟主衣冠失羽儀縱餘山水調絃斷不勝悲

其三

商風號大壑慘淡歲星徂神理綿綿在仙踪渺渺孤曲池殘雪冷高館暮禽呼惆悵遊梁客重來淚已枯

病中答黃金之

伏枕當春暮窮愁豈有寬腰應疑沈約鬢已似潘安詩草牀頭廢烟花夢裡看多君金石贈病起欲加餐

夜雨薛允同至

客舍淒涼夜孤燈照雨聲故人來訪戴樽酒坐班荆流水憐同調浮雲笑此生不須論往事但耦百年耕

嚴灘上懷王仲房

論交二十載湖海邈高風名自青雲薄詩多白髮工靈巖探玉筍流水調絲桐七里扁舟客懷人數斷鴻

馬從甫招飲病中却寄兼呈諸君

故人春酒熟招我醉烟蘿不淺銜杯興其如伏枕何隔簾黃鳥靜當戶白雲多腸斷高陽侶無因共嘯歌

訪陳振狂不值

為愛幽棲客停舟問草堂
片雲移遠樹孤雁帶斜陽
招隱詩空咏談玄意不忘
柴門秋色裏何處採幽芳

吳伯時招遊北郭同方嗣宗作

邀歡初出郭選勝屬清秋
但得逍遙趣何殊汗漫遊
烟雲十里澹花木一庭幽
共泛杯中物陶然散客愁

過朱賓徵館中留酌賦贈同馮彞甫作

楚楚陳中彥明時璧未沽
圖書窺二酉詞賦擅三都
乍

見神偏合相過興不孤交歡尊酒在片月映冰壺

七夕集社中諸子遲柯陳二孝廉不至得槎字

嘉會當今夕移樽對藕花雲霞生滿翰河漢望乘槎砧
搗千門月盤堆五色瓜風流懷二子乞巧向誰家

新秋寄友人

二首

相思歲華晚相望海雲深明月青山夢秋風白石心軒
窓倚桂樹道路入楓林遙想梅花下脩然獨抱吟

其二

高柳自鳴蟬秋風忽灑然擬尋東海釣聊就北牕眠芸
架有遺帙草堂無俸錢物情關百慮轉覺媿前賢

新秋招諸子結社囊山得西字

山中招隱處濁酒熟堪攜秋色梧桐下人烟曲水西聽
蟬依灌木待月步前溪好是蓮花社新詩掃石題

懷袁景從

一片雲如蓋迢迢憶故人西京還獻賦東海漫垂綸芳
樹蟬聲晚空山月色新不知文似者何處混風塵

題囊山蘭若

習靜投山寺蓮花不染心
孤雲團野色片雨散秋陰
竹影侵禪榻松濤雜梵音
無生如可學長此卧東林

社中諸子訪我海上賦此

一區甘寂寞誰問子雲奇
竹徑迎秋早柴門候客遲
落霜晴擁樹流水曲通池
共醉青天月何妨倒接羅

立秋柬立朝叔

南陸流金日科頭卧北窓
忽驚秋葉下暑氣薄澄江白

羽搖雲閣青樽泛釣艘風流過小阮月下倒銀缸

入蘇門

策杖遊何處蘇門慕昔賢松聲疑鳳嘯雲氣似龍潛
臺迴藏修竹山深擁紫烟何當逢石髓一舉挾飛仙

五言排律

送陸使君入覲

萬國趨朝日明堂受計年邦家輸玉帛禮樂偃戈鋌
君是機雲後名高杜前行春蠲井稅折獄掛蒲鞭秋水

門庭靜水壺案牘懸衣冠趨俎豆禾黍被原田俗美謳
歌起風恬疾苦捐潢池應解劍墨綬但鳴絃神雀元堪
紀靈魚穴乍遷七閩推治郡三殿引朝天嶺嶠初馳驛
江津迥泊船觀濤經楚越望日指幽燕奏最遵周典厲
精際漢宣龍顏瞻咫尺虎拜舞蹁躑鴈鷺班還接蓼蕭
賦已傳黃金誇獨賜赤縣夢相牽總慶明良會何慚岳
牧賢春風馳五馬莫戀洞庭荃

夏日登林邦介涼臺

樹杪涼風發高臺騁望宜青山爭睥睨滄海自逶迤日
月團飛蓋雲霄碍接羅夷門公子駕河朔故人卮俠愛
縱橫客狂呼大小兒長歌迴北斗孤嘯振南枝筆帶晴
霞麗筵開落照遲廣寒如可躡員嶠更何之不淺登臨
興應劉此一時

送林咨伯上春官

挾策上燕京翩翩萬里程帆搖揚子渡雁背越王城歲
暮風塵色天涯雨雪聲乘春偕上計謁帝入承明駿索

千金價料登片玉名御堤看弱柳禁苑聽新鶯諫獵文
章麗凌雲氣象橫直窺中秘冊漫請少年纓滄海龍初
起丹山鳳乍鳴柏梁多唱和莫不寄柴荆

咫園篇

為鄭都諫作

名園開咫尺大隱絕風塵嘯傲烟霞老棲遲鬢髮新枯
棹偏不用杖屨每相親豈是陶弘景居然鄭子真蒼停
鄴下客甕抱漢陰人薜荔裁初服蘭茝若比隣柳隨彭
澤徑花壓武陵津金谷空爭麗土泉別有春叢篁遲鳳

翽古柏偃龍鱗醒酒時憑石彈棋或藉茵著書淹歲月
染翰亂星辰環堵原非病於陵豈為貧當年青瑣闥此
日白綸巾濠濮生幽想蓬蒿得隱淪何須吞夢澤差可
避嬴秦方丈知何處乾坤寄此身招遊惟二仲詎厭往
來頻

巫文學齋中除夜全盧元禮作

嘯傲空齋靜窮陰入夜除自憐多偃蹇何以荅居諸犬
馬懷丘壑龍蛇仕卷舒焚香初隱几翦燭一攤書地主

紛陳席兒童追薦蔬情深忘酩酊心折漫躊躇曉漏催
偏急孤牀夢轉虛王孫芳草路明月倍愁余

壽鄒山盧封君

蓬萊浮佳氣繚繞麗華堂采秀烟霞外承恩日月傍五
花開杖履七葉盛冠裳忠孝貽謀遠詩書衍澤長盈庭
皆國器清署更仙郎卓異傳畿甸馳褒寵帝鄉寧親遙
戲綵報主近含香海屋添籌歷皇家正棟樑占星新獻
瑞躔極永呈祥桃李春初滿笙歌夜未央婆婆龍是杖

潦倒玉為漿麋鹿山中侶鵷鷺天際行詞裁三祝頌詩
進九如章聖代嘉元老還看薦錫光

神應篇為方伯劉公作

潭州有古木一旦擊風雷正直神逾壯丹青像乍開普
陀移海島祇樹擁樓臺雲氣疑飛佩潮聲覺渡杯玉毫
觀自在金粟現如來變化原非幻圓通不用猜炎精初
作崇力疾久為災白馬經聲出青蓮藥裏栽巋然存夏
屋健矣等童孩寂滅龍起象昂藏鶴印苔青童飛玉液

元女進金罍解脫春生步皈依
劫作灰猿猴羣習定鸚鵡故遲迴
王母延年術更生命世才荆塗鍾地脉淮泗
引春醅誠孝通羣帝勛名播九垓蘋蘩光俎豆鼎鬲和
鹽梅南斗瞻依者東閩保障哉萱庭滋沆瀣薇省望崔
嵬燕喜稱宜壽鷹揚矯上台風雲乘遇合天地重栽培
願擬河清頌餘波潤草萊

贈柯四

東山多秀色之子擅其英世業工文史時名並弟兄高

臺懷索駿灌木聽求鶯四壁凌雲氣三冬映雪情有時
然太乙何日謫長庚漸展垂天翼還傳擲地聲談應高
碣石價已重連城歲月嗟投筆風塵笑請纓腰間雙劍
在贈爾駕長鯨

賦得春深五鳳城送方伯文之京

黃道躔霄漢青陽逗帝畿花明千樹錦日麗九重扉葱
鬱縈丹闕韶華媚紫薇仙桃蒸瑞靄御柳拂晴暉燕入
雕梁語鶯從綺閣飛六龍爭天矯五柞競光輝雨濕紅

將綻烟濃綠漸肥
玉繩星欲滴金掌露初晞
彤陛搖鳴佩朝霞映彩衣
長楊誇浩蕩上苑慶芳菲
詞藻推潘岳才名重陸機
天顏瞻咫尺鵷鷺沐音徽



薜荔園詩集卷二